

四庫全書

集部

欽定四庫全書

集部

文山集卷二

詳校官庶吉士_臣李傅熊

主事_臣呂雲棟覆勘

總校官進士_臣朱鈐

校對官主事_臣陳墉

謄錄監生_臣陳增



御題文山集

忠義根心節烈身宋家終始一全人文山不獨嘉其藝
題句為師千古臣

奔波江海竟南迴一木難支大厦摧丞相却原入師返

那辭浮語致人猜

天祥以右丞相入元請和與元相已延抗論已延拘之夜亡入真州制使

李庭芝疑天祥來為元游說移文令真州苗再成亟殺之再成不忍給天祥出城遂得脫至高郵東汎海入溫州又元劉岳申作天祥傳稱苗再成欲合淮西制置使李庭芝淮東制置使夏貴兩軍為堵截元兵之計天祥然其說故寄書二閩庭芝得書反以丞相無得脫理罪真州不當納天祥且諭再成亟殺天祥以自白等語抑

揚其詞以庭芝疑天祥為怪然是時庭芝先聞揚州脫
歸兵言元遣一丞相入真州說降而天祥適至故以為
疑且安知非元將料天祥必投揚州先縱反間使庭芝
殺天祥也岳申未悉逃兵流言情事但云得書反疑為
乖亦非
篤論也

苗李守城入不容操戈室裏避其鋒二人

謂李庭芝苗再成也

弗徇忠節豈免千秋閹險兇

岳申以苗李守城不納天祥為非然庭芝當危急存

亡之際為宋守揚州數年將士為之死鬪元所遣詔使
悉焚斬之卒能盡節忠於所事再成雖舊史無傳然能
脫天祥於難卒以城陷不屈而死此二人亦
唐張巡許遠之亞而以不納天祥議之過矣

黃冠如願轉難評

天祥被執元世祖愛其材欲官之天祥曰國亡吾分一死儻緣寬假得以

黃冠歸故鄉他日以方外備顧問可也是天祥亦未嘗不欲生而必於死節使元世祖不殺之而聽其為黃冠一時激烈從容就死適足以成其名鼎革之際似此者不勝俚指在時莫若從容就義精子不知終弟受職應君有以處之耳

難地下見其兄

天祥長子道生沒於進兵惠州時次子佛生以空阬之敗被虜不知所終後以

其弟文壁之子陞為嗣考壁在宋權戶部侍郎廣東總領兼知惠州後降元為臨江路總管兼府尹紀年錄又載天祥有從子隆子仕元寧州判官等語文壁仕宋顯秩又復覲顏仕元九原有知應愧見其兄也

欽定四庫全書

集部四

文山集

別集類三 宋

提要

臣等謹案文山集二十一卷宋文天祥撰天祥字履善又字宋瑞廬陵人寶祐四年登進士第一官至少保右丞相兼樞密使封信國公督兵潮州被執死柴市事迹具宋史本傳天祥平生大節照耀今古而著作亦極雄贍

如長江大河浩瀚無際其廷試對策及上理
宗諸書持論剴直尤不愧肝膽如鐵石之目
故長谷真逸農田餘話曰宋南渡後文體破
碎詩體卑弱惟范石湖陸放翁為平正至晦
菴諸子始欲一變時習模彷彿古作故有神頭
鬼面之論時人漸染既久莫之或改及文天
祥留意杜詩所作頓去當時之凡陋觀指南
前後錄可見不獨忠義冠于一時亦斯文間

氣之發見也生平有文山隨筆數十大冊常
以自隨遭難後盡失之元貞大德間其鄉人
搜訪編為前集三十二卷後集七卷世稱道
體堂刻本考天祥有文山道體堂觀大水記
稱自文山門入過障東橋為道體堂云云則
是堂本其里中名勝而鄉人以為刊板之地
者也書中有原附跋語九條並詳載本事頗
可以資考論明初其本散佚尹鳳岐從內閣

得之重加編次為詩文十七卷起寶祐乙卯迄咸淳甲戌皆通籍後及贛州以前之作江西副使陳价廬陵處士張祥先後刻之附以指南前錄一卷後錄二卷則自德祐丙子天祥奉使入元營間道浮海誓師閩粵羈留燕邸患難中手自編定者吟嘯集則當時書肆所刊行與指南錄頗相複出紀年錄一卷亦天祥在獄時所自述後人復集衆說以益之

惟集杜詩以世久單行未經收入今亦各著
於錄至原本所載序記碑銘之類乃其家子
孫所綴錄冗雜頗甚今並從刪削乾隆四十
六年十二月恭校上

總纂官

臣紀昀

臣

陸錫熊

臣

孫士毅

總校官

臣

陸

費

墀

欽定四庫全書

文淵閣
提要

欽定四庫全書

文山集卷一

宋 文天祥 撰

詩

次鹿鳴宴詩

時提舉知郡李俊梅
迪舉送弟璧同薦

禮樂皇皇使者行光華分似及鄉英貞元虎榜雖聯捷
司隸龍門幸綴名二宋高科猶易事兩蘇清節乃真榮
囊書自負應如此肯遜當年襮正平

集英殿賜進士及第恭謝詩

於皇天子自乘龍三十三年此道中悠遠直參天地化
昇平奚羨帝王功但堅聖志持常久須使生民見泰通
第一臚傳新渥重報恩惟有厲清忠

御賜瓊林宴恭和詩

壬戌以秘書省官與宴

奉詔新彈入仕冠重來軒陛望天顏雲呈五色符旗蓋
露立千官雜佩環燕席巧臨牛女節鸞章光映壁奎間
獻詩陳雅愚臣事況是賡歌氣象還

明堂慶成恭進詩

於皇藝祖得乘乾聖主宣光奕葉前運再庚申皇建極
祀同癸亥數參天中嚴外辦三千禮累洽重熙四十年
願贊帝心長對越至忱功用貫垓埏

敬和道山堂慶瞻御書韻

墨灑天奎映籀紅斯堂殿閣與俱隆方壺圓嶠神仙宅
溫洛滎河造化工列聖文章千載重諸孫聲氣一時同
著庭更有邦人筆稽首承休學二忠

著作之庭乃胡忠簡公書周文忠公

立

劉左司前以著作郎主秘書省營繕事時落成
適潘祕丞得郡攜李并餞行有詩次韻

蓬壺日月四時春金碧新來絢帝宸俎豆幸陪麟省雋
衣冠中有虎符新詩餘和氣生談麈坐久風光入醉茵
多謝蘭臺舊盟主好歸羣玉領儒珍

祕省再會次韻

蓬萊春宴聚文星多荷君恩錫百朋四座衣冠陪賀監

一時梁棟盛吳興圖書光動青藜杖人物溫如古玉升
好是木天新境界螢窗容我種金燈

古玉升見
隋律歷志

送曹大著知廣德軍

暫屈瀛洲客來臨汭水民山川歸史記岳牧屬詞人館
舍朋簪舊都門祖帳新儒林官可紀何止更稱循

贈秘書王監丞

君不見秘書外監賀放翁鏡湖一曲高清風又不見太
子師傅兩疏氏東門祖帳羅羣公人生晚節良不易類

波直下誰障東使人知有在我者二三君子為有功我
公金華山下住赤松安期白雲處風骨細瘦真神仙急
流勇退不肯顧我昔山中想風采幾回擊節歸田疏適
來追陪水蒼佩親見辭歸白當路御筆擢公領蓬山師
表玉立東宮官兩年苦口一去字未許鷗鷺從公閑瑶
池深深鎖策府玉皇宮闕僑其間暫分赤符管下界半
空雲氣常往還多少持麾辭上國悠悠風塵見此客莫
作尋常太守看疏賀以來偉人物夜瞻婺女次舍中一

點光明射南極公歸眠食重調護世道尚憑公氣力

題莆陽卓大著順寧精舍三十韻

人生天地間一死非細事識破

關

實八九分地位趙

岐圖壽藏杜牧擬墓誌祭文潛自撰荷鍤伶常醉此等
蛻浮生見解已不易齊物逍遙遊大抵蒙莊意聖門有
大法學者必孔自知生未了了未到知死地原始則返
終終始本一致後來得西銘精蘊發洙泗吾體天地塞
吾氣天能帥一節非踐形終身莫繼志舜禹顧養參

全穎錫類伯奇令無違申生恭不貳聖賢當其生無日
不惴惴彼豈不大觀何苦勤興寐吾順苟不虧吾寧始
無媿人而有所忝曠達未足智卓哉居士翁方心不姿
媚蒙讒以去國七年無怨對風雨三間茅松楸接蒼翠
斯立亦樂哉未老先位置宇宙如許大豈以為散屣當
其歸去來致命聊自遂天之生賢才初意豈無為民胞
物同與何莫非已累君方仕於朝名高貴所萃乾坤父
母身方來日川至西銘一篇書順事為大義請君觀我

生姑置末四字

送卓大著知漳州

蓬山隔風雨芸觀司陽秋
厭作承明直出為漳浦遊
問俗便桑梓過家拜松楸
錦堂事相儼崇舍陰易留
向來瀾蠡間何物輒負舟
翻覆十年事行止隨坎流
倘來西不再遲取終無尤
太守執此往邦人庶其瘳
昔予援西銘期子以前修
願覲弘濟學四海放一舟

陸氏登三閣源明出一麾
清聲先漳浦便道拜長基

赤子歌來暮同寅賦去思西銘功用大行驗順寧詩
大陸登三閣源明出一麾臨軒親策後上冢過家時
秋色吳山外春風漳水涯斯文交獨厚羌賦送行詩

此初詩也不及
用今附見此

和蕭安撫平林送行韻

逢辰字應父樞密
檢詳江西安撫

得失元來赴塞翁何心桃李問東風人皆有喜榮三仕
我尚無文謝五窮秘苑固知朋可正畏途猶恐甲方衷
欲酌長者殷勤祝坎止流行學四忠

和朱衡守約山韻

渙字行父
大理寺丞

昔人一出正朋字今我慚非行祕書人樣相看願元祐
詩章甚雅突黃初競言汲黯猶須復或謂顏愚亦可如
把酒對花姑勿論春行後長莫妨徐

題玄潭觀雲浪閣用誠齋韻

棄官學道勾山許學到至人本無怒赤子皦皦如魚頭
不堪妖孽腥上流鉗鍵長潭鉄柱立摩挐宮石寶劔濕
當時豈忍如是觀毒流不可開眼看英風凜凜萬古寒

金少隱先生集 卷一
玄潭觀和龔宰韻

晉代何曾谷此陵到今樓觀隱居停
幻成鷗鷺乾坤閱
淘盡魚龍雲水腥
仙有神功叅造化
人將故事入丹青
我來欲去長橋驛
祠下徘徊夜乞靈

送朱制幹象祖

一官暫漫任如何
屢疏箋天氣不磨
宋祚萬年陳大計
周圖五字訂前訛
重尋范老憂時著
旁豎文公衛道戈
投匭近年殊不少
有人說似此君麼

送三山林溶孫歸省

束書遊京師孤雲瞻太行辭歸慕何蕃捨養殊歐陽山
林乾坤靜菽水日月長好味諸公詩勝讀寒泉章

京城借永福寺漆臺口占似王城山

名孟孫字長翁後太

常丞

心如明鏡臺此言出浮屠後來發精義并謂此臺無此
臺已是贊何況形而器圓釋正超然點頭會意思多謝
城山翁一語迎禪鋒顧我塵俗人與物方溶溶

金史卷一百一十五
景定壬戌司戶弟生日有感賦詩

夏中與秋仲兄弟客京華椒柏同歡賀萍蓬可嘆嗟孤
雲在何處明歲却為家料想親闈喜中堂自點茶

梅

梅花耐寒白如玉干涉春風紅更黃若為司花示薄罰
到底不能磨滅香

香者梅之氣白者梅之質以為香不香鼻孔有通窒我
有天者在一白自不易古人重伐木惟恐變顏色大雅

久不作此道豈常息詩翁言外意不能磨滅白

暑布送王廷舉用蕭敬夫韻

平生涼薄資埏陶誤大窑誰知此石恠愈沃乃愈焦崑
崙織火鼠頓易鷄衣飄榮我絲羅附免比蒲柳凋服之
雪漫白長袂風搖搖表之以霧縠緣之以烟綃振衣從
姬滿佩玉遊西瑤

高人不烟火跳出天地窰掀然立千仞塊視金與焦香
袂佛雪冷紫髯逐風飄摩挲冥雲樹豈隨羣卉凋但知

仙骨輕不學倒影搖人間盡描貌妙不在生綃揭斗斟
天漿霞衣却瓊瑤

題陳國秀小園

席地自乾坤半樹閱今古池館豈不寬每換牡丹主園
公非隴傭獨梢占春風弄影不在多嗅香知乃翁

長鶴展輕翮遠棲松桂林故宇入清夢盤盤亦苦心中
林風月賒十畝團幽陰林下有奇士繞柱從之吟

題靜山

地得一以寧凝然者卷石堪巖及培塿異形不異質古
之能定者悟此為一極春榮秋以悴一歲百態出鳥鳴
花落句此意誰與詰所以尼丘人仁智不廢一萬象此
緯經死灰彼何物明發此乎遊參入觀水術

贈折字嗅衣相士

水火坎離紫陽怪滑波皮骨長玻駭解州得解解中膠
費家卦鋪同一解啗字從金詩反窮貝何為分田何同
黃絹幼婦我自樂竹犬多事鴉鶴翁

阿英薰蒸透肌理不潔未蒙好西子芙蓉浪中薔薇水
蘇合蜨娘忘彼已馬嵬新戰鉤新月腥臊千年天地裂
是間曾著鼻孔磨梅香竇臭無如何

贈閭丘相士

急流勇退識真曜昔有麻衣撥地爐我亦愛君雲水趣

莫言雷雨起江湖

言余遇水則發故云

贈神目相士

道茂數遁甲長房得役鬼風鑑麻衣仙地理青鳥子擇

術患不精精義本無二奇哉夢筆生熊魚掩前氏

贈鏡湖相士

五月五日揚子江心水鑄作道人雙瞳子吾面堞子大
安用鏡照二百里

贈秋月葉相士

急流勇退神仙跋蹙龍鍾將相偕問華山山中何似天
津橋上

贈曾蘭谷相士

金史卷之八
卷一
許負眼禰衡口巧言甘莠言醜

贈月洲相士

月洲月眼閱人多且道西州事若何朱紫貴人皆好命
不知中有孔明麼

贈劉矮跛相士

鍊石為形鏗金為音世方好圓癡守方心陰陽細縕人
一氣質善惡之微證於聲色意所欲發雖吾不知彼美
子劉洞其先幾骯髒難合今世道病如子所言生稟已

定慙夫勇士往往一偏以視妾婦豈不猶賢洪範德三
二曰剛克會其歸其好是正直學問工夫氣質用微汝
能觀形安知其餘

子術已定吾情已成子執子術吾安吾情

嫫姆三尺軀舉止如不揚瞻視照肝膽音吐何琅琅君
看水中鳬不及鶴脰長昔聞夔憐蛇未聞一足僵萬物
各自適形色安足量子言良有理與子持酒漿

贈梅谷相士

當年壽陽額春風點顏色後來廣平腸冰雪峙氣骨世人識花面識花還自淺花有歲寒心清真堅百鍊君家在梅谷自詭知梅熟須得花性情不假花頭目莫說和羹事花被和羹累突兀烟水村我梅自林氏

贈碧眼相士

蒼蒼垂天雲靈照行下土秋江浸草木魚鰕歷可數蒼山老麻衣偷入比阿堵色界只點頭從人道吾瞽

贈鏡齋徐相士

鄙忌不如徐公美引鏡自窺得真是門下食客纔有求
昏昏便與妻妾比徐家耳孫却不然自名一鏡京師市
世人無用看青銅此君雙眼明秋水君以無求游公卿
勿令比鏡生瑕滓堞子大面何難知從今光照二百里
贈鑑湖相士

瘦竹凌風弄碧漪山光雲影共熹微月黃昏裏疎枝外
認取半天孤鶴飛

贈趙神眼

金史卷一百一十五
卷一
一條一褐髯如鐵神為秋水眼為月欲從壺子覓三機
劍首終然吹一呖

贈桂巖楊相士

榮悴紛紛未可期夕多未振已朝披得剛難免於今世
行好須看有驗時萱堂前惟有母槐陰庭下豈無兒
好官要做無難做身後生前是兩岐

宣州罷任再贈

貧賤元無富貴思泥塗滑滑總危機世無徐庶不如卧

見到淵明便合歸流落丹心天肯未崢嶸青眼古來稀
西風為語巖前桂若更多言却又非

贛州再贈

此別重逢又幾時贈君此是第三詩衆人皆醉從教酒
獨我無爭且看棋凡事誰能隨物競此心只要有天知
自知自有天知得切莫逢人說項斯

贈彭別峯太極數

手把先天已後書當來一畫本全無白雲山下冷冷水

自在人間太極圖

贈黃生銀河數

乘槎人從天上來
天上知有君平術
黃生能談君平書
不知曾認支機石

贈楊樵隱應炎談命

莘郊一介堯舜君
民薇山二難百世忠
清富春耕叟涕洟雲
臺終南遯士仕宦梯
媒是數公者俱以隱
名木石一跡霄淵異
情九華山人賣樵江
湖請算世間幾種樵

夫

贈葉大明

大明標榜葉氏子自稱後村門下士誤言木吉李為灾
後村曾發一笑來其師流傳說如此寧知禍福乃不爾
屏腰貂首徒勞人甘藜藿無苦辛我生有命殊六六
木李循環相起伏袖中莫出將相圖盡洗舊學讀吾書

贈舒片雲

麻源謫仙人噓呵成陰陽向來懷袖間冉冉天孫裳一

夕大雷電六丁下取將仙人乘風來帝鄉又從膚寸起
飛揚仙術亦如此天機神翕張有時行渾天周游十三
萬里強往來仙馭不可韁正恐問命人望氣蓬萊隔渺
茫

贈彭神機

挽強二石徒碌碌學到穿楊精藝熟百發百中無虛弦
百中一跌前功辱彭君絕識透黃間不師逢羿師珞球
天度三百六十強一算不容失正鵠吾聞天機難語人

往來了了拈衆鏃君姑藏用凝於神矢口莫輕談禍福

贈劉忠樸

檻何為折劒何借鬚肯為拂糞肯嘗馬公布衾王公飯
石家錦障丁家香忠邪佞邪兩無定一珣一璞異其性
忠樸先生躔法高古今四者豈關命五九六餘能善惡
鐵算不是并州錯便從忠樸問如今忠果能忠樸誰樸

贈金稱

我有一叢籬下花黃金滿眼無人拾夜看璇璣度玉衡

猿啼雨外青山濕

贈余月心五首

月之所在謂之身朝市山林幾樣人靜看一輪如此潔
莫將身著軟紅塵

我生之辰月宿斗如何謗譽由箕口月明只合酌眼看
斗亦何須挹漿酒

月比於人歷世多纔圓又缺幾消磨只因受用長生藥
嗟爾死蛙如月何

一種黃州月曹蘇善惡幾吾磯連月釣此月是邪非
子心月其明子術星之數為月詰衆星不知何以故

贈涂內明

老云五色令人盲面壁不視佛慧生彼皆去眼絕人偽
孰知涂者出天成有口能談貴人命有耳能聽貴人聲
此中一片光明藏嗜欲淺處天機深

贈一壺天李日者

汝南市人眼壺小天地大誰知賣藥翁壺寬天地隘李

金史卷一百一十二
卷一
君血肉身大化中一芥天度三百餘滿腔聚著蔡仙翁
以過謫長房以術敗造化多漏泄鬼神爭訝怪君歸視
斯壺口飽深覆蓋得錢且沽酒日晚便罷賣

贈蕭巽齋

未有大撓書先有伏羲易古人尚卜筮今人信命術八
卦與五行皆自河圖出易中元有命道一萬事畢卦義
六十四蕭君得其一江湖旅瑣瑣談命以巽入人情愛
委曲闕嫌棘棘言言依忠孝君平意未失我生獨翫

駢動輒

關

是有

關

流行誰隕復誰詘安能從兒女

朝夕談昵昵

關

卦有人

關

不妨

關

賣直

贈曾一軒

磨蝎之宮星見斗簸之揚之箕有口昌黎安身坡安命

關

生無不有我有斗度限所經適然天尾來臨

關

雖非

關

涉一年見錦紛雜操吾家祿書成巨編

往往日者迷

關

一軒曾正德其說已在前五年

陰陽造化蕩晝夜世間利

關

非偶然未來不必更臆度

金少隱先生集卷一
我自存我謂之天

贈龔豫軒數術

挾筴考休徵巫甘邁何追君亦布靈草乃復探其微載
觀河洛書今也休明時天高鳳鳥翔擊拊邀以嬉

贈剋擇徐吉甫

東望會稽山穆陵鬱岩堯卜壤藏劒履伯也昭其勞昔
者遊仙人龍耳致君王君家世其傳芳躋疇可量青囊
落君手辯語如流河尋雲履高阜湯湯俯長波朔風渺

天垂萬里草離離安得結方軌為君起遐思

贈魏山人

君不見而家直臣犯天怒身死未寒碑已仆又不見而
家處士承天渥閉門水竹以自樂雲仍妙叅曾楊訣謂
余地宅誰優劣小煩穩作子午針靈於已則靈於人

贈老菴廖希說

短屐平生幾兩穿錦囊真得當家傳山中老去稱菴士
天上將來說地仙面皺不妨筋骨健舌存何必齒牙全

金精深處苓堪飯更住人間八百年

彭通伯衛和堂

理身如理國用藥如用兵人能保天和於身為太平外
邪奸其間甚於寇搶攘守護一不謹乘間敵益勦古有
黃帝書猶今六韜經悍夫命雄喙仁將資參苓羽衣為
其徒識破陰陽爭指授別生死錚然震能名道家攝鉛
汞膚腠如重局到頭關鍵密六氣無敢嬰君方建旗鼓
不敢走且驚他時橐吾弓閉門讀黃庭

贈適菴丹士

本是儒家子學為方外事此身恨鳬短有意求蟬蛻猶
留鼎餘藥還授人間世從君卧山中共談弘景祕

贈劉可軒寫真

燕領鳬肩都易寫從前只道點睛難近來阿堵君休問
燈下時將頰影看

慧和尚三絕

畫我郎潛先帝時而今白髮漸參差若交傳入都人眼

疑汝前身妙善師

傳神

風雪衡山涕滿膺
懶殘不管自家身
殷勤撥火分煨手
却有工夫到別人

相

花光老矣墨婆娑
無賴梅花一白何
為問西來宗旨道
世間色相是空麼

畫

象奕各有等級四絕品四人高下

螳臂初來攪晚蟬那知黃雀沐饒涎王孫挾彈無人處
一夜瑯盤薦玳筵

右一為周子善言蕭耕山能勝二劉不覺敗於子善
子善又敗於我

射虎將軍髮欲枯茫茫沙草正迷塗小兒謾取封侯去
還是平陽公主奴

右二為耕山言老夫敗與子善也

坐踞河南百戰雄少年飛槊健如龍
世間只畏兩人在
上有高公下慕容

右三為劉淵伯言所畏者惟吾與子善

擊柱論功不忍看築壇刑馬誓河山
當年絳灌知何似
只在春秋魯衛間

右四為劉定伯言與淵伯上下也

贈樂軒彭善之

吾家小黃溪其間石甚巨可寫歸來辭
可刻盤谷序晉

唐文章手誰敢以自負異時此重來煩君作玉筋

贈墨林曹大崧

魏哉幼婦碑伶俜七步詩又得墨林墨淋漓湊作曹家
三絕奇

贈刊圖書蕭文彬

蒼籀書法祖斯水篆家豪昔人鋒在筆今子鋒在刀收
功崇谿金不禮中山毛囊雖脫穎出鐫崖齊天高

題周山甫錦綉段

金
卷一
客從西北來遺我錦綉段上有雙鳳凰文彩何燦燦置之筵笥中歲月亦已晏天孫顧七襄雷電下河漢鳳凰忽飛去遽然失把玩貧家機杼寒秋蟲助予嘆

還梅村詩軸

迺翁聖俞君瑰辭燦琳琅吾鄉歐陽子逸韻諧宮商人物雄中原園囿盛洛陽醲郁追皇風詭恠抑晚唐雲仍四方志生長百戰場憂國杜少陵感興陳子昂我亦青原人君遺明月光掩卷不能和握手談肝腸

贈羅雪厓樵青

蕭蕭山下人閉門衣裘單春心動溪谷曉起捫松看

題得魚集史評

男兒生作事豪傑死留名天運常相禪江流自不平百年多險夢千古有閑評諸父淵源在吾猶及老成

題彭小林詩藁

其父號雅林

晚識宗文憶浣花刪餘今見雅名家牙籤料理西風讀
共笑鍾山說老鴉

題玉聲甫松坡樵苦唱後

倚柯睨蒼髯短蓑挾風雨談道誰我知對奕者其侶狂
吟發悲調谷鳴相律呂虞庠豈不怨寧售大夫股長鏡
斲仙苓獲薪為吾煮

題毛霆甫詩集

雲澗美毛霆甫詩也 英英白雲在澗之濱彼美人兮
其德孔純 英英白雲在澗之阿彼美人兮其思孔多
白雲英英澗水泱泱彼美人兮顧大且昌 雲澗三章

章四句

送趙王賓三首

風流不比賀家狂，瀟灑黃冠意更長。
自有武夷溪九曲，鑑湖何必問君王。

蕭然被褐不求知，歸倚溪船理釣絲。
却笑荆山空自售，未應有智不如葵。

嬾從原上訪桃花，又不青門去種瓜。
傳得神仙蟬蛻法，君如覺我問烟霞。

又送前人琴棋書畫四首

不知甲子定何年題滿柴桑日醉眠意不在言君解否
壁間琴本是無絃

琴

我愛商山茹紫芝逍遙勝似橘中時紛紛玄白方龍戰
世事從他一局棋

棋

蔡邕去後右軍死誰是風流入品題只少蛟龍大師字

至今風骨在浯溪

書

欲覓龍眠舊時事相傳比本世間無黃金不買昭君本
只買嚴陵歸釣圖

畫

題延真羅道士玉澗

雙巖夾方流知有至妙蘊山石發清暉草木得餘潤泉
源皆寶氣樵牧駭潛蜃仙翁獨危坐華池養水性神澤

溫而栗骨峭老益勁苔磯枕泓碧時有魚出聽靡瓊飯
潺湲冲淡意無眠

聽羅道士琴

斷厓千仞碧下有寒泉落道人揮絲桐清風轉寥廓飄
飄襟袂舉冰紐不禁薄紫烟護丹露雙舞天外鶴

吾聞泗濱磬暗合角與徵又聞天樂泉淨洗箏笛耳如
何碧一泓乃此并二美藍田滄海意請問玉溪子

聞居和雲屋道士

一樽聊共此時心
文字追誰落醉吟
仙子樓臺脩竹外
行人冠蓋畫橋陰
一年芳草東風老
五日空江夜雨深
且作蘭亭歡喜集
更論誰後又誰今

遊集靈觀

時奉
祠祿

小洞烟霞國
重陽風雨秋
歐公嵩嶽步
朱子武夷舟
香火真吾職
觥籌且此遊
龍山馬臺事
糠粃舊王侯

題凝祥觀

前路風塵走且僵
我來一日此徜徉
歐公自是遊嵩觀

迂叟元非過太行始信神仙還有國不知蠻觸是何鄉
世間如此紛紛者贏得山林作道場

遊青原二首

鍾魚間日月竹樹老風烟一徑溪聲滿四山天影圓無
言都是趣有想便成緣夢破啼猿雨開元六百年
空庭橫蟬蛸斷碣偃龍蛇活火參禪笋真泉透佛茶晚
鍾何處雨春水滿城花夜影燈前客江西七祖家

題碧落堂

知瑞
州日

大厦新成燕雀歡與君聊比共清閒地居一郡樓臺上
人在半空烟雨間修復盡還今宇宙感傷猶記舊江山
近來又報秋風緊頗覺憂時鬢欲斑

和龔史君韻

名奇知
瑞州日

淡和心事葛天民回首歸來清渭濱長倩君房孫子行
道原義仲輩流人一生受用忘非是萬事升沈等故新
近日貞元朝士少蒲輪有命出楓宸

餞新班弟

金步口 卷一
送君天上去當戶理瑤琴萬里白鷗遠千山黃葉深江
空行路影日暮倚門心若見西湖雪灞橋人正吟

別弟赴新昌

十載從遊久諸公講切精天淵分理欲內外一知行立
政須規範脩身是法程對床小疏隔戀戀弟兄情

和韻送逸軒劉民章

庚午科
名子後

少日屠龍事已勞送人千里發江濤蓬萊地近風方細
閩闔門開日正高春裏看花須款款雨中剪韭且陶陶

金吾已辦長安月雙鳳扶雲立海黿

題宣州疊嶂樓

初日照高樓輕烟在疎樹峨峨遠岫出泯泯清江去簷
隙委殘溜屋隅連宿莽蒼蔚互低昂熹微分散聚城郭
諒非昔山川儼如故童髻已零落姝顏慰遲莫沈沈澹
忘歸欲歸重回顧

題宣州推官廳覽翠堂前宣州推幕李君於其
廨作亭梅聖俞以覽翠名之而為之記今去之

二百餘年碑埋沒久矣天台陳君容實來發而得之復表之亭上江山如昨翰墨宛然廬陵文
景時守茲土既為作顏間二字復詩以志之

都官自楚產文采光陸離當年從事君如與山川期歲
月忽已適天球落塵土豈曰無嘉賓過者不我顧誰令
赤城子發坎出方珉靈物必復見其見乃以人回視城
南端飛甍俯蒼蒨物理有屈伸流峙豈云變寥寥南樓
月至今有遐音千年一解后共調風中琴亦欲結方軌

擘篴事幽尋行行且言邁踟躕思何深

登雙溪閣

碧落神仙宅當年庾謝來烟雲連草樹山水近樓臺萬
雉銀鈺舉千鴉鐵騎回梅花衣上月把玩為徘徊

題吳城山

龍行人鬼外神在地天間彭蠡石磬出洞庭商舶還秋
風黃鵠闊春雨白鷗閑雲際青如粟河流接海山

貧女吟四首

柴門寒自閉不識賞花心
春筍粹如玉為人拈繡針

春

竹扇掩紅顏辛苦紉白苧
人間羅雪香白苧汗如雨

夏

西風兩鬢鬆涼意吹伶俜
百巧不救貧誤拜織女星

秋

巧梳手欲冰小顰為寒怯
有時衿肘露頗與雪爭潔

冬

名姝吟

丈夫至白首鍾鼎垂功名未有朱門中而無絲竹聲與
主共富貴不見主苦辛名姝從何來婉孌出神京京人
薄生男生女即不貧東家從王侯西家事公卿吾行天
下多朱紫稀晨星大都不一一甚者曠數城如何世上
福冉冉歸娉婷乃知長安市家家生貴人

東方有一士

萬金結遊俠千金買歌舞丹青映第宅從者塞衢路身

卷一
為他人役名聲落塵土他人一何傷富貴還自苦東方
有一士敗垣半風雨不識絲與竹飛雀滿庭戶一飯或
不飽夜夢無驚寤此事古來多難與俗人語

和故人韻

去歲湟中穀醫瘡咸糶新一言堪救藥三秩敢貪嗔自
是仁由已休論哲保身當時若瘖默何面見鄉人
人情嗟愈變世法合何如氣以心平定才因意廣疎時
行或時止無咎亦無譽第一嚴交際琴紳敢不書

賦吉州隆慶寺塔火

玉塔穿空不可梯，剗然霹靂暗招提。
四城決破吳胥眼，一炷然成漢卓躋。
風雨滿山連地捲，鬼神現世覺天低。
時人子細回頭看，萬事悠悠落日西。

寄故人劉方齋

溪頭濁潦擁魚蝦，笑殺漁翁下釣差。
棹取扁舟湖海去，悠悠心事寄蘆花。

題高君寶紺泉

金史卷一百一十五
卷一
渟渟巖下泓澄碧落梧影寒瑤披清姦殘月照淝澗俯
淵測浮雲流日蕩苔穎向來滄浪歌孺子不可關載霑
衣上塵懷古意深永招招素心人相期發深省

題曾氏連理木

后皇嘉樹生僑佹四衢五衢合一軌德澤純洽八方一
乘木而王固如此大明香琴橋真觀玉華李一時圖傳
傳奇觀榮華過眼轉九易惟有武城宅前樹不知何年
已連理從來縣官不以聞武城子孫世傳美人言協氣

薰嘉生此家孝友陶協氣朱門多少鎖喬木百年瞬息
滋一喟焉得鼎鼎為輪囷受命不遷相曾氏傳聞此木
更八世方遇麻陽大夫記誠齋先生字麻陽誠齋又幾
年却入青螺地輿志比來徹當路表名連瑞里有日捧
圖上嘉禾靈草共青史物生隱顯殆有時展如之人亦
應爾梗楠杞梓雖奇生繼比廬陵城北不止稱三瑞

題滕王閣

五雲窻戶瞰滄浪猶帶唐人翰墨香日月四時黃道闊

江山一片畫圖長，迴風何處搏雙鴈。
凍雨誰人駕獨航，回首十年此漂泊。
閣前新柳已成行。

題黃岡寺次吳履齋韻

名讚
丞相

長江幾千里，萬折必歸東。
南浦驚新鴈，廬山隔晚風。
人行荒樹外，秋在斷蕪中。
何日洗兵馬，車書四海同。

龍霧洲覺海寺次李文溪壁間韻

名昂英
侍郎

閣黎鍾後訪團蒲，江色漫漫晝欲晡。
一笛梅邊何滿子，千蓑蘆外筆頭奴。
急風吹鴈還家未，新雨生濤到海無。

本是白鷗隨浩蕩野田漂泊不爲孤

題鍾聖舉積學齋

東家築黃金西家列珊瑚嘆此草露晞良時聊斯須古
人重孜孜殖學乃蓄畬彼美不琢琬櫚中竟何如空同
白雲深君子式其廬渠几照初陽垂籤動涼噓方寸起
岑樓一勺生龍魚辰乎曷來遲競諸復競諸

題顏景彛八窻玲瓏

我聞無纖埃風日自清好面面有芙蓉何如交翠草

吾聞開十牖不及一戶明泰宇有天光八荒盡夷庚

予鄧峒

闕

巽齋歐陽先生為淦鄧峒賦詩以孝

子慈孫望於人先生之盛心也敢不拜辛敬贊

鄧君勉之

乃翁猶旅殯霜露幾焄蒿日與清江逝雲連桂嶺高時
無郭元振夢有令狐綯目斷方田墓招魂我欲騷

題陳正獻公六梅亭

相府亭前梅六株四圍香影護琴書月華猶帶玉堂色

風味曾分金鼎餘五柳門前空寂寞三槐堂上竟蕭疎
惟渠不變凌霜操千古風標只自如

題古礪

為里人張
伯義作

市腰石有千年礪石眼泉無一日乾天下蒼生應有望
不知龍向此中蟠

文山集卷一

欽定四庫全書

文山集卷二

宋 文天祥 撰

詩

文山即事

宇宙風烟闊山林日月長
開灘通燕尾伐石割羊腸
盤谷堪居李廬山偶姓康
知名總閑事一醉棹滄浪

出山

日日騎馬來山中歸時明月長在地但願山人一百年
一年三百餘番醉

關山寄朱約山

一笠一蓑三釣磯歸來不費買山貲洞天福地深數里
石壁湍流清四時樵牧舊蹊今可馬鬼神天巧不容詩
先生曾有空同約那裏江山未是奇

山中即事

攜壺藉草醉斜陽白鶴飛來月下雙蘆葉西風驚別浦

芭蕉夜雨隔疎窻千年帝子朱簾夢一曲仙人鐵笛腔
若問山翁還瘦否手持漁竹下寒江

宿山中用前韻

南山之隩北山陽羽扇輕風共影雙畫檣菰蒲明月笛
青燈蟋蟀白雲窻半生遊子成行債一夜佳人作別腔
倚釣重來此蓑笠梅花十里雪空江

山中

滄洲棹影荻花涼欸乃一聲江水長賴有蓴風堪斫膾

便無花月亦飛觴山中勢已驚東晉席上人多賦晚唐
何處魯羹不可飯蚤拚泉石入膏肓

山中謾成東劉方齋

名夢桂居南湖
太師公玄孫

東風解凍出行嬉一闌烟塵隔翠微自有溪山真樂地
從來富貴是危機二三輩行惟須醉多少公卿未得歸
明日主人酬一座小船旋網鰕魚肥

山中載酒用蕭敬夫韻賦江漲

拍拍春風滿面浮出門一笑大江流坐中狂客有醉白

物外閑人惟奕秋晴抹雨粧總西子日開雲暝一滁州
忽傳十萬軍聲至如在浙江亭上遊

山中立夏用坐客韻

歸來泉石國日月共溪翁夏氣重淵底春光萬象中窮
吟到雲黑飲勝裙紅一陣絃聲好人間解愠風

山中和韻

白扇揮殘暑青鞋踏嫩晴花床尋小隱石鼎引長鳴紗
帽有時去酒壺惟意傾山僧癡與坐閑却瘦彌明

山中自賦

闕

門外蒼松一水脩不必清高逼巢許
祇教瀟灑勝由求空花自滿三千界老樹相看五百秋
坐有鷹揚人物在怕牽昨夢上漁舟

入山即事

江流風瀲灩雲薄雨絲絲上馬忙呼繖巡簷靜看棋露
天厨作潭沙地水生池秉燭留前夕茲遊更絕奇

山中感興三首

載酒之東郊東郊草新綠一雨生江波洲渚失其足青
春豈不惜行樂非所欲采芝復采芝終朝不盈匊大風
從何來奇響振空谷我馬何玄黃息我西山麓

山中有流水霜降石自出驟雨東南來消長不終日故
人書問至為言北風急山深人不知塞馬誰得失挑燈
看古史感淚縱橫發幸生聖明時漁樵以自適

桃花何天天楊柳何依依去年白鳥集今年黃鵠飛昔
為江上潮今為山中雲江上潮有聲山中雲無情一年

足自念沉復百年長但存松栢心天地真茫茫

山中呈聶心遠諸客

誰入山來問野舟一篙花外渡深流小顰風樹蹢躅鶴
淺約湍沙浩蕩鷗湖上有時思洛社人間何處不滁州
徘徊才是黃昏候短笛先吹月上樓

再用前韻

黃葉婆娑上釣舟喚回舊夢到江流多情政自憐檣燕
雨鬢終當付野鷗未說離懷向南浦須知詩意在夔州

朔風昨夜吹沙急早覺寒聲戰玉樓

山中六言三首

兩兩漁舟搖下雙雙紫燕飛
回流水白雲芳草清風明

月蒼苔

鶴外竹聲簌簌座邊松影疎疎
夜靜不收棋局日高猶
卧紗厨

風暖江鴻海燕雨晴簷鵲林鳩
一段青山顏色不隨江
水俱流

用蕭敬夫韻

庭院芭蕉碎綠陰
高山一曲寄瑤琴
西風遊子萬山影
明月故鄉千里心
江上斷鴻隨我老
天涯芳草為誰深
雪中若作梅花夢
約莫孤山人姓林

山中

烟雲開窈窕
荆棘剪離披
蠟屐上下齒
竹枝長短詞
半山江色透
獨樹午陰遲
世上兒孫老
有人猶看棋

倏忽當年遇
蒙茸幾度披
水霞明畫卷
草樹幻騷詞
鳥

過目不瞬江流意自遲世人空黑白一色看坡棋

竹花

黃家紫家關魏姚夷齊玉立青蕭蕭便是人間小天地
不特水上作萍漂

夜歸

市橋燈火未闌珊一簇人家樹影間想把神仙爭羨我
不知我正羨渠閒

八月十六日見梅

廣寒殿裏玉樓開那得孤山處士來
半夜西風半身影
夢中騎得雪驢回

和蕭秋屋韻

蘆花作雪照波流黃葉聲中一半秋
明月嬋娟千里夢
扁舟汗漫五湖遊
星辰活動驚歌笑
風露輕寒敲拍浮
贏得年年清賞處
山河全影入金甌

月夜

月到中天雲劃開
斷橋幻出玉樓臺
夜深一鶴掠舟過

疑是坡仙赤壁來

江行

日日看山好山山色蒼忘機鷗下早戀廐馬行忙松
曉清風濕荷秋流水香短蓑吹鐵笛年歲大江長

紙帳

紙帳白如雪上有坐客影一白不自由黑光蕩無定人
倦影已散依然雪花瑩須臾秉燭眠相忘心目靜

為劉定伯索油巖

我欲登山去采薇江南秋雨正霏霏仙家解有逡巡手
一筇西風落翠微

山中小集

江山閑勝賞萬戶不須留客醉客多事吾詩吾自酬夕
風吹絳蠟春色漾黃流賓客歸來夜滁翁無此遊

新年

梅花枕上聽司晨起綰金章候拜親喜對慈顏看鋪鬢
髮雖疎脫未如銀

生日和聶吉甫

五月初二日

青蒲花未老黃竹笋初生細詠詩工部開評字率更大
江流日影時鳥說春榮共作千年計身謀政自輕

生日和謝愛山長句

松老字伯華

余屏跡山間誦昌黎三星行政自多感亦何有於初
度客謝愛山翩然遠來貽我長句噓拂而縑藉之者
至矣倚歌而和愧不成章

寓形落落大塊間噓吸一氣自往還桑弧未了男子事

何能局促甘囚山昔年此日作初度賓客如雲劇歡舞
今年避影却閉門捧觴自壽白頭母故人憶我能遠來
虹光滿袖生瓊瑰一栢相屬慰岑寂使我發笑愁顏開
簸揚且聽箕張口丈夫壯氣須衝斗夜閑拂劍碧花寒
掘首相期出雲表

生日謝朱約山和來韻

元豐五年正月日洛中耆英佳話出當時韓公七十九
歡噱賡酬老吟筆偉然冠劍照孔鸞鮒背鳩杖蒲輪安

韓公而下文寬夫相高以壽不以官洛塵已隨流水急
雲仍相逢松下石顧我行輩真我來兼暮故事强安排
約對青山共長久醉歌要廣滁州守願隨後社著深衣
聞風伏雨從是非便令攜樽西墅去山花山鳥為歌舞
招招瑶母來庭闈拍手共笑偷桃兒吾山陂陀白雲滿
猿鶴司我北門管紫霞隔斷雞犬聲下有琥珀滋長齡
向來福地七十二此亦清高仙地位朝遊昆侖暮空同
駕風鞭霆迎我公丹崖翠壁千萬丈與公上上上上上

生日山中和蕭敬夫韻

山深不用結涼棚風起江蘋暑氣輕處士林泉自今古
男兒弧矢付豪英客來不必籠中羽我愛無如橘裏枰
一任蒼松栽十里他年猶是茯苓生

與朱古平飲山中和蕭敬夫韻

古平名埴字聖陶丙辰賦魁大

傳
倅

江山自足飲千杯況有如今此客哉石室只還湖守住
蘆峰曾屈晦翁來酒酣剩有詩酬唱步倦何妨車往回

遊徧此山方可別北厓莫遣曉雲開

所懷

英英香蕙瑩朝華收拾東風作一家
燕語鶯啼春又夏
燈花剔盡暗窻斜

山中偶成

白鶴飛來牽我衣東風吹我下漁磯
常年祇為青山誤
直草君王一詔歸

次約山賦杏花韻

名花韻在午晴初雨沁
臙脂臉更敷蒲驛莫妨
娛刺史錦坊豈不勝中
書時無艷曲臨軒縱公
莫魏壇韞匱沽春老綠
陰青子近東風來往一
吹噓

贈南安黃梅峰

清淺風流聖得知黃昏
歸鶴月來時嶺頭更有
高寒處却是江南第一
枝

送人往湖南

鴈拖秋月洞庭邊客路
淒涼野菊天雲隔酒尊
橫北海

風吹詩史落西川
夜深鬼火千山雪
春後鶻花一柱烟
為我祝融峰上看
朝暾白處禮逢仙

題張景名簿尉梅墅并餞入南

喚醒三影燕支魂
一枝半樹專黃昏
江南暗香鬱不住
霜風吹入羅浮村
疎枝不入輞川畫
暗香不到東山棋
雲階一枕梨花夢
參橫月落無人知

和謝愛山晚吟韻
日晚與客散步因
誦夕陽雖好不多
時之句謝愛山欣
然賦之余亦率然
口

占以和亦一時之樂也

日落未落天滄浪懸厓掛壁留餘光紫烟翠霧空迷茫
颼颼度壑松風長牛背短笛吹歸忙飄飄逸興空悠揚
襟懷灑落萬慮亡須臾薄暝山色藏長歌浩浩相激昂
淡雲弄月微昏黃

別謝愛山

綠綺知音早青燈對語遲那知今雨別又重故人思山
隔詩情遠雲含客思悲小樓今夜笛莫向月中吹

君今拂衣去我獨枕書眠一片過林雨數聲當戶蟬情
長空有恨吟苦不成篇後會知何日西風老鴈天

和胡琴窻

名日宣
字德昭

買得青山貴似金瘦筇上下費沈吟
花開花落相關意雲去雲來自在心
夜雨一江漁唱小秋風兩袖客愁深
夾堤密與栽楊柳剝有行人待綠陰

七月十三夜用燈牌字韻湊成一詩與諸賓一
笑

赤壁當年賦子虛
西風忽復到菰蒲
蟾蜍影裏千秋鑑
蟋蟀聲中七月圖
詩思飄飄入雲漢
歌聲隱隱動江湖
萬家蕭鼓連燈火
見說年來此事無

病中作

歲月侵尋見二毛
劍花冷落鶚鶩膏
睡餘吸海龍身瘦
渴裏奔雲馬骨高
百忌不容親酒具
千愁那解減詩豪
起來大作屠門嚼
自笑我非兒女曹

又二絕

瞿塘隘處真重險
勾漏波前又一灘
世事不容輕易看
翻雲覆雨等閒間

病中忽悟道真理
靜處專尋入定工
雨汗淋頭都不管
須臾知氣自冲融

又賦

一病忽兩月
蓬頭夏涉秋
形羸心自壯
手弱筆仍道
昨夜燈如喜
今宵蝶莫愁
問誰驅五瘡
正與五窮謀

一病四十日
西風草木涼
倚床腰見骨
覽鏡眼留眶
倦

策吟詩杖頻燒讀易香夜深排果餌乞巧大醫王

又賦

病中心如故閑中事更生睡猫隨我嬾黠鼠向人鳴羽
扇看棋坐黃冠扶杖行燈前翻自喜瘦得此詩清

驟雨知何處一溪秋水生苦吟肩鶴瘦多病耳蟬鳴隱
几惟便睡挑包正倦行山深明月夜乞我半窻清

寄興逃吾病吟詩老此生風高鴻鴈起晴久鶉鳩鳴野
樹辭秋落溪雲帶雨行晚涼便懶坐移傍竹陰清

借道冠有賦

病中蕭散服黃冠笑倒羣兒指為彈祕監賀君曾道士
翰林蘇子亦祠官酒壺釣具有時樂茶竈筆床隨處安
幸有山陰深密處他年煉就九還丹

又賦

一番潮信過時暫脫熬煎心似轆轤轉身如徽纆纏夜
聽饑鼠嘯晝看伏雌眠急雨千山動應知為解弦

時以
草果

數百枚作
枕遂得汗

病甚夢召至帝所獲宥覺而頓愈遂賦

臥聽風雷叱天官赦小臣平生無害物不死復為人道
德門庭遠君親念慮新自憐螻蟻輩豈意動蒼旻

病愈簡劉小村

秋光沁人骨意氣曉來新古鼎龍團雪虛簷塵尾春商
山奕棋老赤壁洞簫宿風月真倉扁招呼入屋頻
倦餘心似酒病起首如蓬黃竹斷橋雨白蘋長笛風僊
僊鷗屢舞吐吐鴈書空孤負秋來眼閑挑囊下桐

夜坐偶成

蕭蕭秋夜涼
明月入我戶
攬衣起中庭
仰見牛與女
坐久寒露下
悲風動紈素
不遇王子喬
此意誰與語

簡琴窓雲屋竹軒諸友

世情千萬變
險甚劍頭炊
嗜傳姑成癖
登山且作癡
烟霞非疾痼
泉石自心馳
獨喜精神健
山中剩有詩

用前韻留琴窓

百年分上浙
萬事枕中炊
病苦還思老
貪嗔未若癡
雲

低天欲動江長岸如馳明月西風健山頭賦別詩

又用韻簡李深之

名道大
號深齋

晚尊和月吸早飯帶星炊鵬鷗從高下螳蟬任黠癡水
澄神自止雲遠意俱馳門外誰車馬故人來課詩

早起偶成

澹澹池光曙沈沈野色秋片雲生北舍隻鴈過南樓有
見皆成趣無言總是愁芭蕉夜來水嚙罷自搔頭

又用韻

江山如有意天地可無秋
夜月馮驩缺西風王粲樓
露蛩令我喜烟草為誰愁
且醉枯中物相看尚黑頭

曉起

夢破風烟迥衾寒不自由
鐘聲到枕曙月影入簾秋
鴈過江山老蛩吟草樹愁
整冠人共笑兩月不梳頭

遠寺鳴金鐸疏窻試寶熏
秋聲江一片曙影月三分
倦鶴行黃葉癡猿坐白雲
道人無一事抱膝看回文

夜坐

淡烟楓葉路細雨蓼花時宿鴈半江畫寒蛩四壁詩少年成老大吾道付逶遲終有劍心在聞雞坐欲馳

和朱松坡

學醫未至大醫王笑殺年年折臂傷屏裏江山如出色
亭皋松菊已成行細叅不語禪三昧靜對無弦琴一張
多謝嶺頭詩寄我滿園梅意弄春光

陳貫道摘坡詩如寄以自號達者之流也為賦
浩浩歌一首

浩浩歌人生如寄可奈何春秋去來傳鴻燕朝暮出沒
奔羲娥青絲冉冉上霜雪百年歛若彈指過封侯未必
勝瓜圃青門老子聊婆娑江湖流浪何不可亦曾力士
為脫靴清風明月不用買何處不是安樂窩鶴脰豈長
鳬豈短夔足非少絃非多浩浩歌人生如寄可奈何不
能高飛與遠舉天荒地老懸網羅到頭北印一杯土萬
事碌碌空奔波金張許史久寂莫古來賢聖聞丘軻乃
知世間皆長物惟有真我難滅磨浩浩歌人生如寄可

金安口序
卷二
奈何春夢婆春夢婆拍手笑呵呵是亦東坡非亦一東坡

借朱約山韻就賀挂冠

身健尚堪松下飯眼明正好橋中棋青山有約當朱戶
白首何心上粉闌栗里田園供雅興午橋鐘鼓賞清時
晚來倦客秋江上坐看半天黃鵠飛

用前人韻賦招隱

釣魚船上聽吹笛煨芋爐頭看下棋勝有晚愁歸別浦

已無春夢到端闌去年尚憶桃紅處好景重逢橋綠時
珍重山人招隱意猿啼鶴嘯白雲飛

用前人韻招山行以春為期

掃殘竹徑隨人坐鑿破苔磯到處棋一水樓臺開曉鏡
萬山花木放春闌雪中更有回舟興林下豈無燒筍時
莫待東風吹柳絮眼穿籠鶴遶湖飛

翰林權直罷歸和朱約山韻

閑雲舒卷無聲畫醉石敲推一色棋試問挂瓢棲碧洞

何如襖被卧彤闈夢中芳草還成路別後黃花又是時
羞殺今年堂上燕片心寄與鴈南飛

慶羅氏祖母百歲羅氏慶門壽母百歲父老見
所未嘗鄉里夸以為盛某既交朋升堂為壽退
布席廳事與橫舟昆弟子姪舉酒盡歡酒酣賦
詩志喜也

麗日萱花照五雲升堂風采見乾淳蓬萊會上逢王母
婺女光中見老人雨露一門華髮潤江山滿座綠衣新

只將千歲求為壽更住人間九百春

拜羅氏百歲母之明日主人舉酒客張千載心

賦詩某喜贊不自己見之趣韻

翠微三島近畫閣五雲橫春水鷗聲滑夕陽鴉背明尊
前持一笑花下卧餘醒曾見瑤池母不為虛此生

醉清湖上三日存叟獨不在坐即席有懷

石鼎吟方透瑤觴醉未闌疎林花密綴舊壘燕新安春
半湖山好夜深江海寒王孫隔芳草初月正相看

羅山長存叟兄弟來謝宴山中

存叟名耕登科

天開盤谷隱春到浣溪家一水樓臺影滿山桃李花春風寄橫笛夜月擬垂槎政好逢佳客江空北斗斜

壽朱約山八十韻

九月十三日

翠袖瓊樓八十翁平安曉宇看孤鴻五湖圖裏添彭祖南極光中約祝融日日青山醉春色年年黃菊飽西風鷹揚但願無施處臣老婆婆一釣蓬

壽朱約山八十三歲

八十餘翁雪滿顛深衣大帶耳垂肩磻溪回首今三載
絳縣論心又十年歸去來分真富貴美哉壽也活神仙
門前燕雀紛如雨媿我白雲深處眠

賀秘書歐陽吳齋先生遷居

名守道
字公權

先生挾冊當菑畲不待辛勤有屋廬宅樣只還齊里舊
鄉風好似潁川居鏡湖今日賀外監瀛館前年虞秘書
天下經綸猶一室時人尚敢說吾迂

挽李制帥二首

名遇龍
字叔興

上下荆淮劍氣雄
進當全蜀凜英風
將壇歃血金湯志
白腹填天竹帛功
治法征謀闕世道
精忠定力簡皇衷
傷哉生出瞿塘險
翻落黃梁一夢中

世變江河渺未涯
如公真是濟時危
幾年荆益龍驤譽
一日瀟湘鵬識悲
天下皆傳清獻節
人心自有武侯碑
郎君昔共慈恩約
技淚西風寄些詞

挽孫庸齋

樞密兄

淮水奇人物
樞星偉弟兄
泰山開學譜
雲谷發詩源
委

吏初行志修文莫返魂功名傳久遠賴有二郎存

挽龔用和

結屋南陵三十秋
田園舊隱隔江流
廊州避亂杜工部
下澤乘車馬少遊
名利無心付隍鹿
詩書有種出烟樓
長淮清關難歸玉魂魄
猶應戀故丘

挽萬監丞益之

文華時輩石質樸
古風餘壁上春陵
記屏間太極圖雲
山居士屋風雪故
人書一夢中觀化
堯夫以後無

哭祕書彭止所

名方過丙辰省元

人物孤中秘神山返異仙目穿陪紼處夢斷膠書年玉質應無死韋編豈不傳莫芻和淚遣此月向誰圓

挽潮守吳西林

名道夫字深源沒於潮

凜凜千軍筆堂堂一面威荆流春浪湧峽樹暮雲飛素壁琴猶在中橋鶴不歸劒亭遺跡古豐石照山輝

傾蓋歲年晚相知江海深春天思北樹夜雨話西林玉嶺生前夢中原地下心英雄凋落盡慷慨一霜襟

挽高郵守晏桂山

名陶字復之秘書丞

淮南已仙去桂樹鬱青青五馬賢聲望三丞舊典刑邦人多感嘆諸老半凋零何日持雞酒傷心請莖銘

挽鄆晉叔主簿

名晉同榜

此君何坦坦回首杏園遊魂魄湘潭去聲名彭澤休百年中道短千里故鄉愁六子三方幼遺言可淚流

挽王叔遠

孟嘗生五日白首嘆遭逢燈火殘編雨薤鹽短褐風八

天下鵬鶚半水偃蛟龍原上諸生哭黃花衰草中

挽蕭帥機虎溪

名了翁
字明可

世以千金重誰能學隱君一門名似雨滿座客如雲志
願生無恨聲華死有聞韓碑照原草含笑有斯文

挽朱尚書貌孫

一代文昌貴千年諫議名天球聲渾厚元酒韻和平巖
穴思風采朝廷惜老成東西生死別江水淚為傾

挽太博朱古平

白氏賢司馬昌黎真學官江湖驚落筆朝野望彈冠天
馬高風骨秋鷹折羽翰萊庭人白髮烟雨萬松寒
鐵硯傷同志青燈憶舊遊臨軒朝鳳闕馳道聽雞籌魏
野神仙宅元龍湖海樓西風一揮淚世事蓋棺休

挽黎致政

黎探
花祖

楚峰天地濶四世百年家鶴髮垂袍葉龍孫上榜花詩
書新雨露松栢老烟霞白馬蒼山路斯人忽已遐

古心江先生以舊弼出鎮長沙癸酉十月乙亥

是為七十六歲門人文某以一節趨走部內謹
擬古體一首為壽

炎圖啟丕運皇路熙以平蛻蟪發令姿有美洵一人鴻
藻舒朝華大音鏘韶鈞黼珽麗三階火龍昭統絃桓圭
殿南服熊旂被金城瞻彼鷄尾火翼軫宣其精祥鸞舞瑤
席鳴鳳翔鳩筮孟冬兆陽氣西北無浮雲駕言酌春酒
可以寫我情揚旂下祝融躡履朝泰清嘉猷扇九垓還
以遂古淳君子保金石所以永國成純嘏錫千歲綿綿

贊休明

送張宗甫兄弟楚觀登舟赴湖北試

金螺曉氣照人寒，手把天漿領佩環。
夜月送魚來赤壁，秋風吹鴈發衡山。
東南折處旗花見，牛女光中槎影還。
見說青年文賦好，士龍一笑共雲間。

衡州送胡端逸赴漕

號觀齋

楚觀簷花曉，舟人擊鼓東。
蛟龍嘶靈雨，鵬鷃展雄風。
此客雲霄士，斯文造化工。
捷來君飲此，我亦凱元戎。

時八月十

五日發
兵討賊

題楚觀樓

西風吹感慨曉氣薄登臨半壁楚雲立一川湘雨深
乾坤橫笛影江海倚樓心遺恨飛鴻外南來訪遠音

安序宋吏部來牧衡陽某將指聯事好也會以
便郡歸養獲忝交承臨發賦詩湘水千里

傾蓋年華晚行人早發湘白雲虹浪小明月燕花香
南浦春何急巴山雨正長祝君加一飯我意為桐鄉

贈周東卿畫魚

觀君瀟湘圖起我濠上心
短褐波濤舊秋雨菰蒲深

某叨臬衡湘蒙恩以便郡歸養肯齋大卿實寓

衡我十年前邦君也一再見間即分南北五言

啟之所以致今舊雨之繼繼云

李肯齋
名節

瀟湘一夜雨湖水十年雲
相見皆成老重逢便作分
鴈春浩蕩回鴈曉殷勤
江關人方健月明思對君

幕客載酒舟中即席序別

故人滿江海遊子下瀟湘夢載月千里意行雲一方櫓
聲人語小岸影客心長總是浮萍迹飛花莫近檣

用韻謝諸客和章

傳鼓發船去我秦君向湘持螯思太白占鵲問東方世
味秋雲薄交情江水長相期天路曉陣馬度風檣

湘潭道中贈丁碧眼相士

自詭衡山道士孫至今句法有軒轅世人未見題堯廟
盡把昌黎作寓言

收拾衡雲作羽衣，便如屈子遠遊歸。
離騷忘却題天柱，為立斜陽問翠微。

咸淳甲戌第二朔予道儲洲里徐畋方諫自長沙來為別問客幾何曰半年矣臨別為賦

君為湘水燕，我作衡陽鴈。
鴈去燕方留，白雲草迷岸。

和衡守宋安序送行詩并序

某將指固功，叨符便養初。
聯寅誼近依清燕，之香未忝交盟親。
授朱提之印冠蓋一時之盛事，縉紳百世。

之深情別集殷勤歌詞鄭重夢回雲舍深懷萱草之
詩思乏雪車謾和梅花之賦瞻言作遠覽擲為榮

玉立湘西第一州丹梯小為嶽雲留東風城郭人行樂
春日旌旗公出遊便起綈香摩碧漢莫嫌繡影挽清流
兩君相見衣冠好記取兒孫好話頭

方共衡雲把酒魁春風吹向鬱孤臺鴈將回處驚帆落
花未開時怯笛催別草可堪遊子去寄梅應為故人來
臨行笑覓疑香譜十駕那追逸驥材

贈萍鄉道士

道士觀行人半似重相見古云性相近性豈不如面萬
形本一世萬心方一殊世固難絕聖亦恐難絕愚

白髭行

憶昔守宣時白上一根髮去之四五年一化為七八今
年客衡湘黑髭已多黃衆黃忽一白驚見如陵陽白髮
已為常白髭何足恠歲月不可歇雪霜日長大世人競
染緇厭之固足嗤誰服蘆菰湯避老亦奚為少老如春

秋造物以為儔吾方樂吾天樂天故不憂

將母赴贛道西昌

重來鷗閣曉帆影漲新晴倚檻雲來去閉簾花送迎江
湖春汗漫歲月老崢嶸手把忘憂草變變繞太清

快閣遇雨觀瀾

一笑登臨晚江流接太虛自慚雲出岫爭訝雨隨車慷
慨十闌柳周回千里魚故園隄好在夜夢繞吾廬

題鬱孤臺

城郭春聲閣樓臺晝影遲並天浮雪界益海出雲旗風
雨十年夢江湖萬里思倚闌時止顧空翠濕朝曦

子題鬱孤泉筦五湖翁姚濂為之和翁官滿歸
里因韻贄別并謝前辱

巢龜君住好蒲翠我來遲夜雨呼三韭春風試一旗飛
花行客夢芳草故人思何日五湖上同看浴海曦

用韻謝前人

茲遊良解后吾道未遲遲斗笠橫雙劍牛津直兩旗止

風應小住明日便相思輸與君家近扶桑五色曦

翠玉樓晚雨

晚樓一曲轉梅花官事無多報放衙林木蔽虧烟斷續
江流曲折雨橫斜年華冉冉風前影歲莫悠悠客裏家
一鴈近從沙背落更饒片雪入天涯

翠玉樓觀雪

矯矯臨清泚濛濛認翠微
綈春生客袖鐵冷上戎衣
柳眼驚何老梅花覺半肥
新來有公事白戰破重圍

翠玉樓和胡端逸韻

客影魚千里年華柳十圍白雲棲石密黃鵠出烟微江
海秋風老湖山晚日暉鬱孤臺上望野闊犢初肥

翠玉樓

昏鴉何處落野渡少人行黃葉聲在地青山影入城江
湖行客夢風雨故鄉情試問南來信梅花三兩英

合江樓

天上名鷗尾人間說虎頭春風千萬岫秋水兩三洲客

晚驚黃葉官闕笑白鷗雙江日東下我欲賦扁舟
西楚驚鴻晚東淮落木秋蒸相今石鼓句宛古宣州白
日聊清賞青山總舊遊不知滄海水何處接天流

皂蓋樓

一水樓臺繞半空圖畫開蝸涎行薜荔雀影上莓苔碧
落人千載青山酒一桮晚烟看不盡待月却歸來

石樓

曉色重簾捲春聲疊鼓催長垣連草樹遠水照樓臺八

境烟濃淡六街人往來平安消息好看到嶺頭梅

馬祖巖

曾將飛錫破苔痕一片雲根鎖洞門山外人家山下路
石頭心事付無言

禪關

秋風吹日上禪關路入松花第一彎只願四時烟霧少
滿樓城閣見青山

吸江

絕壁千尋俯雪潭
春花秋草自盤鬚
當年誤著蒲團坐
惹得人稱馬祖巖

塵外

半山風雨截江城
未脫人間總是塵
中夜起看衣上月
青天如水露華新

雲端

半空天矯起層臺
傳道劉安車馬來
山上自晴山下雨
倚闌平立看風雷

清江何漢英再見於空同讀歐陽先生詩感慨
為賦

采芝雲滿山采檠瀑垂澗當年有清徽為寄南來鴈鴈
去人已逝歲月割云晏流水失聲音西河老憂患往日
志士悲窮途行子慣君為梁宋遊我復江漢宦十年耿
相逢千里欠一盼玄機寄糟粕美疾墮芻豢贈子
歸東方聊薦吳興覽

送曾倅巖山官滿歸里

名大發
懶倅

春陵光霽落蒼苔
葛水神仙立翠槐
萬里雲霞騏驎路
三年風月鳳皇臺
興同老子復不淺
歌曰先生歸去來
庾嶺梅花開漸徧
一枝就與寄蓬萊

和前人賦別

翠松三萬頃松雪著神仙
柳院催金鑰江花送玉鞭
曉巖雲壁立晚棹浪規圓
未了醉翁事重尋潁上田
當年童子見今見二毛翁
海月三秋別江雲一日同
鷗心馳舍止龍尾曳天東
定有延和奏南來寄一通

贈明脈蕭信叔

枚乘擅七發郭玉明四難微言起沈痼此道今漫漫云
何東海生而乃緒真要若然以神遇契彼鏡經妙我欲
炊彫胡俯鑿菊水泉壽被方輿人六氣何由僞

贈林碧鑑相士

咸陽宮中四尺鏡照人五臟何炯炯桑田滄海千餘年
百鍊依然化為鑛君從何處得此物鑄就雙瞳敵秋月
向來照心今照形不事瀾翻三寸舌遠衝風雪肯我過

金步已及八
卷二
看來猶未深知我我方蓑笠立釣磯萬事浮雲都勘破
噫嘻吁只今神目鬼眼紛道途暗中許負應盧胡試問
何如林家老碧鑑不知天津橋上復有龍鍾無

送吉州陳守解任

美人策良馬俎節螺江湄歲年忽晼晚桃李已成蹊遙
遙一水間漫漫東與西晴川夾修楊行舟何能維朱鳳
翔海山層漢揚音徽高岡有梧桐駕言覽朝暉贈君以
白雲白雲不我持贈君以明月明月不我攜白雲與明

月遠道相追隨

贈蜀醫鍾正甫

炎皇覽衆草異種多西州為君望岷峨使我雙淚流向
來秦越人朝落夕邯鄲子持鵲經來自西亦徂南江南
有羈羽豈不懷故營何當同皇風六氣和且平

改題萬安縣凝祥觀

古道松花空翠香風前鬢影照滄浪飛泉半壁朝雲濕
啼鳥滿山春日長須信神仙元有國不知蠻觸是何鄉

道人橫笛招歸鶴，坐到斜暉上壁璫。

相如遊獵賦：華棟壁璫，注壁璫以玉。

為椽頭

西昌倪氏有山谷書杜陵山水圖，障歌作江山

堂堂廢，其後人以黃書求題跋，感慨一絕。

杜二已無黃九去，長歌大字落江山。百年風物今何似，
春水晚烟飛白鷗。

山中再次胡德昭韻

不將顏色汙黃金，落得灞橋驢上吟。是處江山生酒興，

滿天風雪得梅心
觥籌堂裏春聲沸
燈火林皋夜色深
人世可能行樂耳
重遊不用卜陰晴

人生柳絮鬪堅牢
過眼春光歎伯勞
蜀道謾傳千古險
廬山方許一人高
眼前見赤徒妨道
耳後生風未當豪
明月蘆花隨處有
扁舟自在不須篙

曾見尊前此客哉
笑攜麈尾拂莓苔
水邊飛鴈年年見
湖上新亭日日來
酹菊醉餘披草坐
探梅吟罷帶花回
止厓尚被剛風隔
笑殺匆匆馬上栢

山中泛舟觴客

便作乘槎客蕭蕭骨髮清尊前山月過笛裏水風生半
夜魚龍沸未秋河漢明雪堂眠二客夢與白鷗盟

病中作

六月廿四夜人間熱欲炊病懷如酒困倦睫似書癡夢
與千年接心隨萬里馳客來相問訊寄語有新詩

山中即事

山中方雨笠天外忽晴絲夕釣江登練春行路布棋乾

坤供俯仰歲月任差池有酒如澠在何妨日問奇

挽吳齋先生歐陽大著

徘徊西河上月落衆星稀哲人萎中道雨絕將安之昔
者麗鴻藻玉振舍清暉名理軼晉魏雅言襲軻思連駕
勤馳道並坐侍端闈及門懷燕婉升堂接逶迤方期黃
鵠關忽作朝露晞黔婁不蓋體延陵有遺悲層阿翳寒
樹平楚曖希微惟荒衣廣柳縞冠涕如縻水從章江去
雲遶楚山飛已矣如有聞斯文不在茲

送劉其發入蜀

秋風淒已寒蜀道阻且長
虎狼伏原野欲濟川無梁
客從何處來云我之西方
蕭蕭驢驢鳴熠熠湛盧光
昔時榮華地今為爭戰場
將軍揚天戈壯士發戎行
江南有羈鳥悠悠懷故鄉
駕雲與子遊雲天何芒芒

周蒼厓入吾山作圖詩贈之

三生石上結因緣
袍笏橫斜學米顛
漁父幾忘山下路
仙人時訪嶺頭船
烏猿白鶴無根樹
淡月疎星一線天

為我醉呼添濛瀼倦來平卧看雲烟


題羅次說竹巖摘藁

游子西南來出門道何悠文章會有用意氣輕身謀紛
紛食梁肉藜藿當其憂君看百川水何處不東流

挽劉知縣

名元高字仲山實齋之子

玉海淵源懿金閨步武高功名千載意翰墨一時豪天
馬含風滑秋鷹折羽毛相逢俱白髮流涕濕征舸



文山集卷二